

TEZAU LITURGIC

5 IULIE

ACATISTUL SF. CUVIOS ATANASIE ATHONITUL



MOSCOVA, 2000



Акафист

святому преподобному

Афанасию Афонскому

чудотворцу

Кондак 1

Избранный от града Трапезунта и во Афоне постнически просиявый, дивный подвижниче и чудотворче, преподобне отче Афанасие, скорый помощниче и целебниче недугов душевных и телесных, яко имеяй велие дерзновение к прославльшему тя Господу, от всяких нас бед свободи и на спасения стези руководи, да зовем ти хвалебно:

Радуйся, преподобне Афанасие, Афонский чудотворче.

Икос 1

Ангелов и всяя твари Содетель, избравый Гору Афонскую земным уделом Пречистыя Своея Матере и даровавый ю в вечное достояние иночествующих, яви тя в ней светла

свещильника, весь собор преподобных украшающа. Темже убо, яко великому угоднику Христову, воспеваем ти сице:

Радуйся, предобрый иноков наставниче;

Радуйся, преславный ангелов собеседниче.

Радуйся, целомудрия дивное светило;

Радуйся, усерднейший исполнителю поста и воздержания.

Радуйся, духовной во Христе жизни премудрый учителю;

Радуйся, светлый образе кротости и смирения.

Радуйся, имя твое дела безсмертия оправдавый;

Радуйся, деяние и видение чудно в себе сочетавай.

Радуйся, преподобному Петру Афонскому в равноангельном житии подражавый;

Радуйся, равную с ним на Небеси славу восприявый.

Радуйся, преподобне Афанасие, Афонский чудотворче.

Кондак 2

Егда, по блаженном успении родителей твоих, еще младенцу ти сущу и не могущу о себе промышляти, Всеблагий Господь Божественным Своим Промыслом устрои едину черноризицу пещися о тебе, и та воспитоваше тя вместо сына, тогда ты, блаженне, видя сию питательницу твою пребывающую в пощении и молитвах, потщался еси, елико бе мощно отрочати, подражати святому тоя житию, поя с нею Христу Богу: Аллилуиа.

Икос 2

Разум небесный даровася тебе, угодниче Божий, егда в Константиград пришед, в любомудрии книжном обучитися тщался еси: ибо толико в оном преуспев, яко в мале времени изряден ритор и премудр учитель показался еси. Мы же сие Богом умудренному ти приносим сицевыя немудрыя хвалы:

Радуйся, начало премудрости, страх Божий, правилом жизни себе предложивый;

Радуйся, вся заповеди Господни со тщанием хранивый.

Радуйся, любомудрием твоим суету мира сего
ясно рассмотревый;

Радуйся, пещися о душе своей усердно
вожделевый.

Радуйся, в юности посту и молитве
обучивыйся;

Радуйся, в священных писаниих прилежно
поучивыйся.

Радуйся, измлада сединою мудрости
украшивыйся;

Радуйся, о лишении родителей твоих
Господем утешенный.

Радуйся, воздержанием паче неже млеком
воспитавыйся;

Радуйся, от сверстных тебе отроков
наставником монахов презнаменовавыйся.

Радуйся, преподобне Афанасие, Афонский
чудотворче.

Кондак 3

Сила благодати Божией сочетаваясь благому
произволению твоему, поможе ти, блаженне,
избежати многоплетенных сетей мира сего и
посла тебе святого старца Михаила, вождя и

наставника житию иноческому, в немже до кончины твоея добре подвизался еси, поя Богу: Аллилуиа.

Икос 3

Имея велие желание равноангельнаго жития иноческаго, Царьград оставил еси, блаженне, и обители Малеины достиг, преподобным Михаилом в иноческую власяницу, яко воин в броня, оболчен был еси; и тако мужественно ополчился еси противу невидимых врагов рода человеческого. Сего ради ублажаем тя сие:

Радуйся, от млада возраста вдавый себе на служение Господу;

Радуйся, Того единого паче всего возлюбивый.

Радуйся, Царствия ради Небеснаго честь и славу мира оставивый;

Радуйся, вся временная яко уметы презревый.

Радуйся, плоть духу покоривый;

Радуйся, ум твой в богомыслие вперивый.

Радуйся, помыслы вражия бодро отразивый;

Радуйся, святынею и чистотою ангелом
уподобивыйся.

Радуйся, Кименския обители велие
украшение;

Радуйся, Афону слава и благолепие.

Радуйся, преподобне Афанасие, Афонский
чудотворче.

Кондак 4

Славы временныя и почитания от
боголюбивых воевод, яко бури и волнения
морского избегая, Кименскую обитель оставив,
во святую Гору Афонскую, яко в тихое
пристанище, достигл еси, преподобне Афанасие,
и тамо предался еси в послушание старцев
подвижников, поя с ними Христу Богу:
Аллилуиа.

Икос 4

Слышаще прот и прочии отцы Святыя Горы
сладкое твое Священных Писаний
добровещание, удивляхуся силе благодати из уст
твоих исходящей и прославляху Бога; един же от
них, преподобный Павел, пророчески о тебе
рече: сей, последи нас пришедый, будет
первейший добродетелию и славою в Царствии

Небеснем. Сего пророчества мы ныне сбытие
ведяще, радостно вопием ти:

Радуйся, дивный избранниче Божий;

Радуйся, пречестное Святаго Духа селение.

Радуйся, преподобных отцев восхваление;

Радуйся, проречений их исполнение.

Радуйся, риторе сладковещанный и
богомудрый;

Радуйся, краснописче предобрый и
трудолюбивый.

Радуйся, благочиния церковнаго ревнителю;

Радуйся, душевредных в храме шептаний
искоренителю.

Радуйся, премудрыми твоими и
благодатными глаголы благочестивыя воеводы
удививый;

Радуйся, на спасения стези тех руководивый.

Радуйся, преподобне Афанасие, Афонский
чудотворче.

Кондак 5

Звезды светлее явися миру житие твое,
преподобне отче Афанасие: ты бо сам шествуя

путем тесным и скорбным, право ведущим в Царствие Небесное, и иных многих научал еси творити волю Господню и представил еси тех Христу Богу добродетельми сияющих, поя с ними: Аллилуиа.

Икос 5

Видя враг рода человеческого созидание тобою обители ко вселению иночествующих, вельми раздражися и рече другом своим: о друзи и силы мои! Доколе терпим и не расторгнем враждебника нашего Афанасия? Ты же отче, молитвою твоею ко Господу, яко жезлом, поразил еси тех ополчения. Сего ради воспеваем ти сице:

Радуйся, добрый воине Христов;

Радуйся, славный победителю невидимых врагов.

Радуйся, клеветавшия на тя старцы радостно простивый;

Радуйся, враги твоя яко друзи возлюбивый.

Радуйся, Богом врученному ти стаду добрый пастырь бывый;

Радуйся, словесныя твоя овцы от волков мысленных защитивый.

Радуйся, дар умиления от Бога приявый;
Радуйся, богатство добродетелей собравый.

Радуйся, Самого Христа Господа в видении
зрети сподобивыйся;

Радуйся, яко Того ныне зриши на Престоле
Славы сидяща.

Радуйся, преподобне Афанасие, Афонский
чудотворче.

Кондак 6

Проповедует Гора Афонская труды твоя и
подвиги, имиже в удолиих и дебрех ея яко
безплотен подвизался еси, преподобне; наипаче
же вещает славу твою священная твоя Лавра, в
нейже цельбоподательныя мощи твоя почивают,
источающия токи чудес и исцелений, верою о
тебе поющим Богу: Аллилуиа.

Икос 6

Возсиял еси, преподобне, в брenneй плоти
светом небесным, яко пламень огненный, еже
ученик твой Герасим сподобився зрети, со
ужасом возопи: о, отче! Темже и мы вопием ти:

Радуйся, отче, светом добродетелей твоих
мир озаривый;

Радуйся, темная бесовская полчища из пустыни Афона отгнавый.

Радуйся, сиянием твоего лица ученика твоего удививый.

Радуйся, лютую того болезнь единым словом исцеливый.

Радуйся, в тленной плоти нетленною славою озарен бывый;

Радуйся, огонь любви Божественныя в себе носивый.

Радуйся, в Царствии Отца Небеснаго яко солнце сияющий;

Радуйся, молитвенниче наш ко Христу Богу теплейший.

Радуйся, в бедах скорый помощниче;

Радуйся, в печалех великий утешителю.

Радуйся, преподобне Афанасие, Афонский чудотворче.

Кондак 7

Хотя христолюбивый воевода Никифор изыти на брань противу нечестивых агарян, моляше отцев Афонских, да помолятся о нем к Богу и да пошлют тя к нему. Ты же, отче Афанасие,

повинуясь отцем, аще и не хотя, путешествовал еси до Крита, и тамо молитвами твоими помог еси христианом победити агаряны, неведущия пети Богу: Аллилуиа.

Икос 7

Новое умысли зло прелукавый диавол, егда подвиже на зависть единого от ученик твоих, и научи его заклати тя, яко агнца непорочна. Ты же, отче, десницею Вышняго спасен быв, убийцу онаго отечески простил и облобызал еси. Темже вси мы, таковому твоему незлобию дивящиеся, хвалебно вопием:

Радуйся, в кротости и смирении твоём Христу Богу подражавый;

Радуйся, незлобием твоим духа злобы победивый.

Радуйся, сокровищ Христовых дражайший бисере, егоже не возможе душегубец похитити;

Радуйся, егоже десница Господня храняше от всех зол.

Радуйся, от внезапного убийства спасенный;

Радуйся, смертоносным питием, по слову Господню, неврежденный.

Радуйся, триех мужей, от глада и мраза
изнемогших, смерти избавивый;

Радуйся, многих от различных болезней
исцеливый.

Радуйся, верныя в православии утвердивый;

Радуйся, лжеверныя и неверныя
посрамивый.

Радуйся, преподобне Афанасие, Афонский
чудотворче.

Кондак 8

Странное чудо бе видети, егда повелением
твоим, отче, в знойное время почерпнутая из
моря сланая вода сотворися хладна и сладка,
пьющия ю прохладившая и жажду утолившая.
Темже убо величаем Господа, даровавшего тебе
таковый дар чудотворения, и во умилении
вопием Ему: Аллилуиа.

Икос 8

Дивно явися тебе Матерь Христа Бога
нашего, и повеле ти жезлом поразити камень, из
негоже абие истече источник водный, иже и до
ныне источает воду живу и целебну. Таковому к

тебе благоволению Владычицы чюдящеся,
взываем сице:

Радуйся, яко пресветлое лице Царицы
Небесныя зрети сподобился еси;

Радуйся, яко повелением Ея извел еси воду из
камене.

Радуйся, яко сим преславным чудом
боговидцу Моисею подобен показался еси;

Радуйся, яко с сим великим пророком в
райских обителях ныне обитаеши.

Радуйся, яко источник твой благодатно
посещаеши;

Радуйся, яко болящим здравие подаваеши.

Радуйся, яко прокаженныя очищаеши;

Радуйся, яко нечистыя духи от человек
отгоняеши.

Радуйся, яко недужным усердно послужил
еси;

Радуйся, яко чревныя и неудобоцелимыя
язвы уврачевал еси.

Радуйся, преподобне Афанасие, Афонский
чудотворче.

Кондак 9

Всяк язык человекъ недоумевае по
достоянию восхвалити благоволения Царицы
Небесныя к подвижником христианским: Та бо
в Лавру твою, отче, с двема ангеломъ прииде, и
учеником твоим Матфием видима бысть в
храме, раздающа златницы и цаты, усердно
предстоящим и поющим Богу: Аллилуиа.

Икос 9

Вси иноцы Горы Афонския блажат тя, отче
Афанасие, яко наставника своего и тепла
ходатая; не лишены же суть благодатныя твоя
помощи и вси православнии людие, с любовию
почитающии святую память твою и взывающии
сице:

Радуйся, святым и чудным твоим житием
святоименный Афон возвеличивый;

Радуйся, небовосходную добродетелей твоих
лествицу нам в образ оставивый.

Радуйся, земнаго жребия Матери Божией
честное украшение;

Радуйся, иночества православнаго похвало.

Радуйся, за многую твою к согрешающим любовь и милосердие милость Божию получивый;

Радуйся, за великое твое о странных попечение от странствовавшего нас ради Господа в вечных скиниях славно почтенный.

Радуйся за славную твою над плотию и диаволом победу венцем славы увенчанный;

Радуйся, за девственную чистоту и сердечную простоту от Приснодевы Марии в ближайшее содружество приятый.

Радуйся, яко благоволением Царицы Небесная, созданная тобою во имя Ея обитель в твое имя преименовася;

Радуйся, яко день преставления твоего в сей обители светло торжествуется.

Радуйся, преподобне Афанасие, Афонский чудотворче.

Кондак 10

Спасти хотя Богом врученное ти стадо от раздоров и соблазнов, и к скончанию смертному приближаяся, завет учеником твоим письмены начертал еси, отче, поучая всех взаимной братской любви и хранению отеческих

преданий. Мы же, хваляще таковое твое о чадах попечение, поем Христу Спасителю нашему: Аллилуиа.

Икос 10

Стеною терпения оградився и надеждою вечных благ укрепився, земное странствие тесною стезею прошел еси, преподобне Афанасие, нося ярем поста, многонощного бдения и о вверенных тебе душах попечения; ныне же, в небесном пребывая блаженстве, помяни нас, восхваляющих тя сице:

Радуйся, крепкий подвижнике, вся разжженные стрелы лукаваго угасивый;

Радуйся, слез излиянными душу твою чисто омывый.

Радуйся, немощи немощных отечески носивый;

Радуйся, в глубину прегрешений впадшия на гору добродетелей возводивый.

Радуйся, многих великих мужей наставник бывый;

Радуйся, царя Никифора в неисполнении даннаго Богу обета кротко обличивый.

Радуйся, будущая пророчески предвидевый;
Радуйся, далече отстоящая ясно зревай.

Радуйся, Божия славы теплый рачителю;

Радуйся, велений его ревностный
исполнителю.

Радуйся, преподобне Афанасие, Афонский
чудотворче.

Кондак 11

Песнь благодарения принесл еси, отче, Богу,
дивно спасшему тя от потопления морского со
ученики твоими, егда, действием духа злобы,
ладия, в нейже плыл еси, опровержена бысть, и
вси в ней сущии, в пучину впадше, не погибоша
и воспеша хвалу Господеви: Аллилуиа.

Икос 11

Светом благодати Божия озарен имея твой ум
и сердце, преподобне отче Афанасие,
таинственно предрекл еси твою страдальческую
кончину, в нейже яко мученик под развалинами
падшаго храма телом погребся, духом
преселился еси в горния обители, в нихже,
ходатайством твоим ко Господу помози
водворитися и нам, вопиющим ти сице:

Радуйся, в животе и по преставлении твоём
многая и преславная чудеса сотворивый;

Радуйся, от ноги твоея кровь яко миро
благовонное чудесно источивый.

Радуйся, на честное погребение твоё
множество иноков собравый;

Радуйся, во гробе тело твоё небесною
радостью светящееся показавый.

Радуйся, помазанием крове твоея болящаго
корабленника со одра смертнаго здрава
возставивый;

Радуйся, сею же твоею кровию кровоточивую
жену уврачевавый.

Радуйся, всех сердца любовью твоею, к себе
привлекающий;

Радуйся, благоуханием Божия благодати
смерд страстей от многих отгоняющий.

Радуйся, светильниче пресветлый, от горы
Афона всему миру православному сияющий;

Радуйся, не точию иноком, но и миряном
путь к небу озаряющий.

Радуйся, преподобне Афанасие, Афонский
чудотворче.

Кондак 12

Благодать велия тебе, отче, от Бога дадесе,
добродетельные человеки на вящшее
преуспеяние наставляти, грешныя же к
покаянию побуждати, пруги от нив отгоняти и
различныя недуги и страсти врачевати. Темже
убо смиренно молим тя, отче: не лиши помощи
твоя и нас, поющих Богу: Аллилуиа.

Икос 12

Поюще святое, равноангельное твое житие,
ублажаем тя, отче Афанасие, яко многомошна
молитвенника о нас пред Господем, тепла
заступника и наставника ко спасению, и с
любовию возглашаем ти сице:

Радуйся, православныя Церкви похвало;

Радуйся, обители твоя и всея Горы Афонския
покровителю.

Радуйся, пустынного безмолвия искренний
любителю;

Радуйся, общежития мудрый руководителю;

Радуйся, постническаго жития истинный
ревнителю;

Радуйся, всех иноческих добродетелей светлый образе и учителю.

Радуйся, яко смирения ради не восхотел еси явити миру мощей твоих;

Радуйся, яко хотящим изъяти оныя из недр земных огнем воспретил еси.

Радуйся, яко до ныне православнии людие покланяются святому твоему гробу;

Радуйся, яко и чудодейственный жезл твой тамо зрим есть.

Радуйся, преподобне Афанасие, Афонский чудотворче.

Кондак 13

О, предивный иноков наставниче и чудотворче, преподобне отче Афанасие, предстояй ныне Престолу Царя Славы Господа нашего Иисуса Христа, молися Ему даровати всем нам дух истинныя кротости, любви и целомудрия, да, скончавши живот наш в покаянии, сподобимся со всеми святыми в Небесном Царствии пети Богу: Аллилуиа.

*(Сей кондак читается трижды. И паки чтутся:
Икос 1 и Кондак 1)*

Молитва

Преподобне отче Афанасие, изрядный угодниче Христов, и великий Афонский чудотворче! Во дни земнаго жития твоего многия на путь правый наставивый, и в Царствие Небесное мудре руководивый, скорбныя утешивый, падающим подавый руку помощи, и всем любезен, милостив и сострадателен отец бывый; ты ныне, в небесней пребывая светлости, наипаче умножаеши любовь твою к нам немощным, в море житейском различне бедствующим, искушаемым духом злобы и страстьми своими, воюющими на дух. Сего ради смиренно молим тя, святой отче: по данней тебе от Бога благодати помози нам творити волю Господню в простоте сердца и смирении, искушения же вражия победити и свирепое страстей море изсушити; да тако немокренно преидем житейскую пучину, и предстательством твоим ко Господу, сподобимся достигнути обетованнаго нам Царствия Небеснаго, славяще Безначальную Троицу, Отца и Сына и Святаго Духа, ныне и присно и во веки веков. Аминь.



ПОЛНЫЙ АКАФИСТНИК КАНОНИЧЕСКИЙ

АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ

I

НОВОЕ
* НЕБО